



Schweizerische Eidgenossenschaft

Confédération suisse

Confederazione Svizzera

Confederaziun svizra

Swiss Confederation

Departament federal d'affars exteriurs DFAE

# Communicaziun a las medias

Berna 18.02.2025

---

## **Cunvegna da cooperaziun e minoritads: visita uffiziala dal cusseglier federal Ignazio Cassis en Rumenia**

Il schef dal Departament federal d'affars exteriurs (DFAE) visita dals 19 fin ils 21 da favrer 2025 la Rumenia. Sin il program stattan differentas scuntradas bilaterales sco er la suttascripziun da cunvegnas da cooperaziun en il rom da la segunda contribuziun da la Svizra a tscherts stadis commembers da la UE. In ulteriur punct central vegn ad esser il tema «minoritads». En quest connex vegn il cusseglier federal Ignazio Cassis a sa participar a Bucarest ad in'occurrenza culturala a chaschun da la tschintgavla emna internaziunala da la lingua rumantscha (Emna rumantscha) ed en la citad da Constanța ad ina discussiun davart las minoritads linguisticas.

La Svizra e la Rumenia tgiran relaziuns bilaterales excellentas ed in viv barat politic, economic e cultural. La Rumenia è la partenaria commerziala la pli impurtanta da la Svizra en l'Europa dal Sidost. L'onn 2023 ha il volumen commerzial tranter quests dus pajais importà 2,7 milliardas francs.

Durant sia visita uffiziala vegn il cusseglier federal Ignazio Cassis a sa scuntrar surtut cun il primminister Marcel Ciolacu, il minister da l'exterior Emil Hurezeanu, il minister da finanzas Tánczos Barna ed il minister da l'educaziun, da la retschertga e da l'innovaziun Daniel David. En discussiun stattan tranter auter las cunvegnas da cooperaziun liadas a la segunda contribuziun svizra a favur da tscherts stadis commembers da la UE. Tut en tut survegn la Rumenia 211,5 milliuns francs. Cun la segunda contribuziun da coesiun europeica vul la Svizra canticuar ses engaschament en Rumenia, en spezial en ils secturs scolaziun duala, effizienza energetica, perscrutaziun ed innovaziun, segirezza publica e societad civila.

En quest rom vegn il schef dal DFAE a suttascriver pliras cunvegnas da cooperaziun en ils secturs effizienza energetica, furmaziun duala, segirezza publica e sanadad.

A chaschun dals discurs uffizials dal cusseglier federal Ignazio Cassis duain ultra da quai vegnir tractadas las relaziuns tranter la UE e la Rumenia respectivamain tranter la UE e la Svizra sco er il conflict en l'Ucraina che parta in cunfin cun la Rumenia. Er la reconstrucziun da l'Ucraina vegn ad esser tematisada.

### **Saira culturala a chaschun da l'Emna rumantscha e visita a Constanța**

La Svizra e la Rumenia collia in mintgadi multicultural e pluriling. Ultra da quai han ils dus pajais duas linguis cuminaivlas: il tudestg ed il talian. Accumpagnà dal cusseglier guovernativ grischun Jon Domenic Parolini vegn il cusseglier federal Ignazio Cassis a sa participar ad in'occurrenza culturala a Bucarest. L'occurrenza vegn organisada da l'ambassada svizra en Rumenia e dal museum naziunal dal vitg «Dimitrie Gusti». Appreziadas vegnan la diversitat e las minoritads dals dus pajais. L'occurrenza è ina part da la tschintgavla emna internaziunala da la lingua rumantscha (Emna rumantscha), ina iniziativa ch'il schef dal DFAE ha lantschà. «L'Emna rumantscha è in'occasiun da parter in'experimentscha sumeglianta cun auters pajais, numnadama in la convivenza quotidiana da differentas culturas ed ina gronda diversitat d'opiniuns. La diversitat promova il dialog ch'è pli impurtant che mai en vista a la situaziun geopolitica difficulta», uschia il cusseglier federal Ignazio Cassis.

Suenter viagia il schef dal DFAE vinavant a Constanța, ina da las quatter citads las pli grondas dal pajais. En la citad ch'è situada dal tuttafatg a l'ost da la Rumenia, a la riva vest da la Mar Naira, sa chatta il port il pli impurtant da la regiun. En questa regiun vivan er differentas minoritads etnicas e linguisticas. A Constanța sa participescha il cusseglier federal Ignazio Cassis ad in discurs a la maisa radunda davart l'impurtanza da las minoritads linguisticas per il svilup regiunal.

Links:

[Relaziuns bilaterales Svizra–Rumenia](#)

### **L'Emna rumantscha en furma concisa**

Quest onn ha lieu la tschintgavla emna internaziunala da la lingua rumantscha (Emna rumantscha). L'Emna rumantscha deriva d'ina idea ch'il cusseglier federal Ignazio Cassis ha exprimì a chaschun da la festa per il giubileum da 100 onns da la Lia Rumantscha a Zuoz. Suenter è ella vegnida realisada dal DFAE en collauraziun cun il chantun Grischun e la Lia Rumantscha. L'Emna rumantscha ha adina lieu l'enna dals 20 da favrer, il di ch'il rumantsch è vegnì declarà uffizialmain sco quarta lingua naziunala l'onn 1938.

L'Emna rumantscha mussa, tge impurtanza che la plurilinguitad n'ha betg mo per la coesiun naziunala, mabain er per la politica exteriura da la Svizra. La diversitat da la Svizra vegn stimada sin l'entir mund. La promozion da las linguis minoritaras ed uschia er da las minoritads culturalas è in factur central per stabilir ina societad persistenta ch'è abla da manar dialogs.